

NAQQIUT

Una saqqummiussisummut 12. maj 2014-imi ullulerneqarsimasumut taarsiunneqarpoq.

Saqqummiussisut nutaamik oqaaseqartalerneqarsimavoq. Taamaasilluni taaguut Naalakkersuisut Siulittaasuat aamma Nunanut Allanut Tunngasunut Naalakkersuisoq iluarsineqarsimavoq.

Matumuuna saqqummiussisut imaattoq saqqummiunneqassaaq:

Nunatsinni nukissiuuteqarnikkut niuernermik ingerlatsiviup, ikummatisanik pilersuvittut ingerlasup pisortanit pigineqartup Polaroilip KNI A/S-imit avissaartinneqarluni 1. januar 2015-imit aallartittumik ingerlatseqatigiiffittut ingerlanneqalernissaa siunteralugu Naalakkersuisut piareersaataasumik sulissuteqaqqullugit peqquneqarnissaanik Inatsisartut aalajangiiffigisassaattut siunnersuut.

(Inatsisartuni ilaasortaasut, Knud Kristiansen aamma Gerhardt Petersen)

Saqqummiussisut

(Naalakkersuisut siulittaasuat aamma Nunanut allanut tunngasunut Naalakkersuisoq)

Siullermeerneqarnera

Naalakkersuisut aalajangiiffigisassatut siunnersuut soqutigalugu atuarsimavaat.

Naalakkersuisut aallarniutitut naliliippit KNI A/S-ip immikkoortortaqarfiinik marlunngorlugu avissaartitsinissaq pillugu aalajangiisoqannginnerani pissutsit arlalippassuit isiginiarneqaqqaartariaqartut. Avissaartitsinermi suna siunertarineqarnersoq eqquumaffigineqarnissaa pingaaruteqarpoq. Immikkoortortaqarfifit marluk avissaartinneqarnerini erseqqissuutitsinissap qularnaarneqarnissaa siunnersuuteqartut siunertaraat tamannalu Naalakkersuisut tunngaviatigut isumaqatigaat. Tamatumunngali peqatigitillugu oqaatigineqassaaq avissaartitsineq soorunami aamma aningaasartuuteqarnerulissutaassammatt, tassami maannamut ingerlariaatsimut sanilliullugu aaqqissuussaanerit marluk pilersinneqassammata. Tamatuma assersuutigalugu kingunerissavaa siulersuisut marluunissaat, direktørit marluunissaat il.il. tamannalu soorunami akitsorsaataallunilu aningaasartuuteqarnerulissutaassaaq.

Aningaaseriviit Pilersuisumut immikkut ingerlalersussamut aningaasalersuinissaat tamatumunnga peqatigitillugu qularnaarneqartariaqarpoq tamatumalu qanoq piumasaqaateqarfiusumik pisinnaanissaa unamminartuuvoq. Polaroilip aallaavittut immikkut

niuerfittut nukittuumik inissisimanissa namminerlu pitsasumik
aninggaasalersuilersinnaanissa qularnanngilaq akerlianilli Pilersuisoq immikkut niuerfiulluni
unammisassaqassalluni.

Naalakkersuisut isumaqarput siunnersuut tunngavissaqarpallaanngitsumik siunnersuutigine-qartoq, tassami tamatumani siullerpaamik KNI A/S-ip, tassunga pingaartumik ilanngullugu Pilersuisup pingarnertut piginnittutut periusissiapi sorliup siunissami malinneqarnissaa paasineqartariaqarmat. Ingerlatseqatigiiffiup avissaartinneqarnissaa kisiat sulissutigineqassappat tamanna arajutsineqaratarsinnaammatt.

Taamaattumik aalajangiiffisassatut siunnersummut tunngatillugu siunnersuutip taamatut iluseqartillugu itigartitsissutigineqarnissaa tamatumunngalu taarsiullugu Naalakkersuisut UPA 2015-imi imartunerusumik siunertaqartumik nutaamik aalajangiiffisassatut siunnersuuteqarnissaat Naalakkersuisut siunnersuutiginiarpaat, taamaalillutik Inatsisartut Pilersuisup sumut sammisumik ingerlatinneqarnissaanut atatillugu avissaartitsinissap eqqartornissaanut periarfissaqarniassammata.

Tamanna tunngavigalugu siunnersuutip itigartitsissutigineqarnissaa Naalakkersuisut inas-sutigaat.

Naalakkersuisut ima allannguutissatut siunnersuuteqarput:

”2014-ip ingerlanerani KNI-p ataatsimut misissueqqissaarfingineqarnissaanik Naalakkersuisut peqquneqassasut. Misissueqqissaarneq KNI A/S-ip siunissami piginnittutut periusissiassamut siunnersummit imaqassaaq, tassunga ilanngullugu immikkoortortaqarfait taakku marluk avissaartinneqarneranni iluaqtissat ajoqutissallu saqqummiunneqassallutik.
Misissueqqissaarineq UPA2015-imi Inatsisartunut saqqummiunneqassaaq.”